

UPNA ETKIKNA

Leitungah upna ci a minvawh ding, tapi om hi. Tua upna min akivawh khempeuh Christian thuthuk kammal taktak khatna in en leng, upna cih lian a i min vawh ding i thei kei kikphial dinghi. Banghanghiam cih leh, mihing te ngaihsut nazia (subjectivism) i tel zawhloh thu tapi om ahih man ahihi. Hih thu i tel na dingin, anuai ah tawm i en dinghi.

Upna i ngahzia te:

1. Christian khangthak ihih man in, nu le pa leh veng le paam tung pan upna thu i theitheih hi.
2. Kiim le paam ii omzia, kalsuan zia in, ei mimal khat ciat ii tungah upna thu hong puak hi.
3. Laisimna, theihna tuamtuam te in upna thu hongtheisak hi.
4. Ngeina pawlkhat in upna hongpia hi.

Hih atung a teng i et ciangin, bangci bang upna koi cibangin kingah hiam cih i thei zonai keilai hi.

Hih atung a thu li tengin upna ihngah na lampi te ahihi. Hi lite pen apua lampan hongpai upna lampi te ahihi. Apua lampan hongpia upna lampi ihcih ciangin, nakan masak hilo, nangzon masak hilo, na upna pen na ngah ahihi. Tua ahih man in, tua upna in, atawntungin thanem hi. Banghanghiam icih ciangin:

a) Na zakna hongtangzai semsem a, ahi zongin na upna thuzak hong tawmsemm tak ciangin, nazak na ii khutnuai ah na upna in sila hong suakta hi.

b) Nakiim napaam hongki lamdang semsem ta a, ahi zongin kiim le paam tawh kituak in, na upna thu tawh akisai dotna leh dawna te na neihtheih nawnloh tak ciangin, nakiim napaam khutnuai ah, na upna in sal hong suakta hi.

c) Pilna siamna lamah leitungin sangsemsem a, ahi zongin, na upna in tua pilna siamna te tungah gualzawhna alak zawh nawnloh tak ciangin, na upna in tua pilna siamna te ii khut nuai ah kol hongtang ta hi.

d) Khang kilamdang semsem in, ngei na, pianzia, omzia khawl zia te hongki lamdang semsem hi. Ahi zongin na upna in tua aki lamdang ngeina, pianzia, khawlzia, omzia te tawh hong ki tonkhawm theih nawn loh ciangin, na upna nazumpihta hi.

Tua hi a, hih atunga thuli tengin upna hongpia ahih hang in atawntung in kikhelsak thei a, tua upna in thanem mahmah ahih manin, "eiki hello upna" kici hi. "Ei kihel lo upna" tawh i nungta a, i upna thu leh, i upthu i thei kei theilai hi. Tua a hih manin, i neih upna enkik siamding leh, ki etpih siamding kisampha mahmah hi. Thungen napi, thunget na ii vangliatna i thei khol kei a, i kantuan kei lailai thei hi. I deih i nget dingbek i thei hi. Tua in upna picing mi thungetna zia ahi naikei hi.

Biakinn kikhawm pai napi in, ngeina ngaihsut khapahpah ihih man in, biakna banghiam cih thu i theikei a, i upna i tha nem pih hi. Tua upna picing ngei lo hi. Apicinglo upna in ngalulok bang honghi sak in, akpi leiphiat hong bangsak thei hi. Upna in Pasian tawh kizopna hi a, nakizop lam natel a, tua kizopna khau nalet kip leh "thu ummi" taktak nahi dinghi.